

Rapport annual 2016 da l'Uniun per la Litteratura Rumantscha

■ **(cp) Las acziuns principalas da l'ULR èn stadas la tgira da contact cun ils commembers, sco er il post dad infurmaziun per diversas dumondas concernent auturas ed auturs rumantschs.** Sco associada da la CER ScRL ha la representantanta da l'ULR era gi sesidas dals societaris da la Chasa Editura Rumantscha.

Purschida: inscunter litterar (punct dubel) e novitads litteraras

Ensem cun la CER ha l'ULR organisà l'onn passà in inscunter litterar «punct dubel»: ils 28 da october han *Göri Klainguti* ed *Tresa Rütters Seeli* prelegi da lur texts per part anc betg publicgads en il teater Zuoz Globe dal Lyceum Alpinum a Zuoz e discutà davart lur scriber cun il moderatur *Benedetto Vigne*. Plinavant ha l'ULR cuntinuà cun sia newsletter «novitads litteraras»: ca. mintga dus mais obtegnan commembras e commembers (sco era var 70 amis da la litteratura) in e-mail cun novitads davart prelecziuns e

purschidas per auturas e lecturs. Adina puspè datti annunziats per quest newsletter uschia che nus vulain continuar cun questa purschida.

Preschientscha en il web

L'ULR ha cusseglia differents persunas ed instituziuns cun dar scleriment davart auturas ed auturs rumantschs, dentant era surtut cun far propostas a persunas che tschertgavan auturas ed auturs rumantschs per differents publicaziuns u translaziuns. Era las infurmaziuns davart la litteratura rumantscha èn dumandadas. Per contanscher dapli ed era gliud pli giuvna vul la ULR bagegiar ora sia preschientscha en il web ed en las raits socialas, tranter auter cun in profil da Facebook che è gia online e nua ch'i ha era gia dà intginas dumondas pertutgant la litteratura rumantscha. In'otra finamira è l'optimaziun da la website. Ulteriurmain resta era l'incarica sco associada da la CER.

26avels Dis da litteratura a Domat

Ils 26avels Dis da litteratura (Ddl) a Domat han gi lieu dals 4 als 6 da november 2016 ed èn stads sut il motto «Rispli sin pupi». E sco usità han els pudì registrar in bun ed allegraivel dumber da visitadras e visitaders. Era sche nagin da la suprastanza da l'ULR fa part dal comité d'organisasiun dals Ddl, sa spruvain nus da restar en contact vicendaivel. Davent da l'onn 2017 vegn la nova presidenta *Viola Pfeiffer* dentant ad esser preschenta a las sesidas da comite d'organisasiun dals Ddl per rinforzar il contact ed il barat.

Litteratura 35

Ils 6 da november 2016 è stada als Ddl la vernissascha da la Litteratura 35 «SUT 35». Quella ediziun speziala, redigida dad *Uorschla Natalia Caprez Brühlhart* e *Silvana Derungs*, è stada deditgada a la litteratura dad auturas giuvnas sut 35 onns apunta (nagins auturs masculins èn stads da la partida). La redacziun ha fatg

appel a las auturas da sviluppar lur texts cun agid da mentorAs; ensem cun ils texts finals è er vegnì publicgà il process da mentorat. Ils mentorats èn stads pusaivels grazia a sustegns finanziels straordinaris.

Ideas per il futur / Litteratura 36 e 37

Cunquai che il premi da la SRG.R 2017 va al comité dals Ddl èsi planisà da organisar ina collavuraziun tematica pli stretga tranter ils Ddl e la Litteratura 36 per festivar quest eveniment. Plinavant planisescha la ULR puspè ateliers da scriber. Per 2018 è previs in pli grond atelier en collavuraziun cun la Litteratura 37 – uschia ch'ils texts creads en l'atelier pon era vegnir publicgads.

Suprastanza

Ils 16-04-16 a la radunanza generala è *Viola Pfeiffer* vegnida elegida sco nova presidenta da la ULR ed ils 7-6-2016 ha la surdada da uffizi gi lieu.

In autur ed essaist provocant

Beat Sterchi en Chasa Rumantscha a Cuira

■ **L'Uniun per la Litteratura Rumantscha (ULR) envida sonda, ils 29 d'avrigl suen-termezdi, ad in referat da l'autur bernais Beat Sterchi.** Sterchi, renumà per tesas provocantas, discorra dal complex d'infuriadad linguistic dal svizzer tudestg e ple- da per in'egualitad tranter «hochsprache» e «mundart». Ma l'autur vegn er a preleger or da sias truvaglias litteraras.

Beat Sterchi ha fatg furora ils emprims onns otganta cun ses roman «Blösch», in roman che cumbinescha puresser muntagnard cun l'immigraziun lavurera. L'autur, ch'ha vivì in temp en America ed en Spagna, brigliescha er cun tocs da teater u cun essays. Dapi varsaquants onns fa el part da «Bern ist überall», ina gruppaziun che tgira la litteratura orala moderna. L'onn passà è sortì ses cudesch essaistic «Mut zur Mündigkeit. Vom Reden und Schreiben in der Schweiz». Referat e prelecziun han lieu suenter la radunanza generala da l'ULR en la Chasa Rumantscha (Via da la Plessur 47) a Cuira. Era persunas betg commembras da l'uniun èn cordialmain envidadas al referat ed a la discussiun suandanta. L'entrada è libra. Il referat cumenza a las 14.15.

Dapli infos: <http://www.beatsterchi.ch>



Beat Sterchi.